

- भाजपा सांसद ओम बिरला लगातार दूजी बार लोकसभा अध्यक्ष चुणिज्या-श्री बिरला 18 वीं लोकसभा मांय लोकतांत्रिक मूल्यां ने निभावण ने आपरी प्राथमिकता बताया।
- मुख्यमंत्री भजनलाल शर्मा काले झुंझुनूं ऊं सामाजिक सुरक्षा पेंशन योजना री बधी रकम पेंशनर रा बैंक खातां मांय सीधा हस्तान्तरित करेला।
- प्रदेश मांय मॉनसून और आगे बध्यो- उदयपुर, करौली, भरतपुर मांय चोखी बिरखा।
- मादक पदार्थां रा दुरुपयोग अर गैर कानूनी तस्करी रे खिलाफ अंतरराष्ट्रीय दिवस माथे प्रदेशभर मांय जागरूकता कार्यक्रम।

000

भाजपा सांसद ओम बिरला ध्वनिमत ऊं आज 18वीं लोकसभा रा अध्यक्ष चुण लीरीज्या। विपख ई ओहदा सारू कांग्रेस सांसद के. सुरेश ने आप रो उम्मीदवार बणाया हा फेरू ई सदन मांय मत विभाजन री मांग नी करी। चुणाव रे पछे प्रधानमंत्री नरेन्द्र मोदी, विपख रा नेता राहुल गांधी अर संसदीय कार्य मंत्री किरेंन रिजिजू श्री बिरला ने अध्यक्ष रा आसन ताई ले गया। इण ऊं पैला जदे आज संवारा सदन री बैठक सरू व्ही, तो प्रधानमंत्री अर राष्ट्रीय जनतांत्रिक गठबंधन रा बारा दूजा नेतावां श्री बिरला ने अध्यक्ष रा रूप मांय चुणण सारू प्रस्ताव पेश कर्यो। विपख कानी ऊं शिवसेना (यूबीटी) नेता अरविंद सावंत, राष्ट्रवादी कांग्रेस पार्टी (शरद पवार) री सुप्रिया सुले अर समाजवादी पार्टी रा आनंद भदौरिया श्री सुरेश रा पगस मांय प्रस्ताव पेश कर्यो। श्री बिरला लारली लोकसभा मांय ई अध्यक्ष हा। आप रा भाषण मांय श्री बिरला दुबारा सदन रा अध्यक्ष रा रूप मांय काम करण रो मौको देवण अर वां माथे विश्वास जतावण सारू सदन रा सगळा सदस्यां ने धन्यवाद दियो।

ईण ऊं पैला प्रधानमंत्री श्री बिरला ने वां रे चुणाव माथे बधाई देवता कह्यो के श्री बिरला दूजी बार लोकसभा अध्यक्ष चुण्या जावण ऊं आज इतिहास बण्यो है। विपख रा नेता राहुल गांधी श्री बिरला ने बधाई देवता कह्यो के ओ सदन लोगां री उम्मीदा री नुमाइन्दगी करे है। वणा श्री बिरला ने सदन रा सुचारू संचालन मांय विपख रा सहयोग रो भरोसा दियो। राज्यपाल कलराज मिश्र दूजी बार लोकसभा अध्यक्ष चुण्या जावण माथे ओम बिरला ने शुभकामनावां दी है। राज्यपाल कह्यो के राजस्थान सारू आ मान री बात है क लोकसभा मांय राजस्थान रा सांसद ओम बिरला लगातार दूजी बार अध्यक्ष रो ओहदो संभाळेला। वणा कह्यो के श्री बिरला रा मार्गदर्शन मांय लोकतंत्र ने मजबूती मिलेला। श्री बिरला रे लगातार दूजी बार स्पीकर चुण्या जावण माथे प्रदेशभर मांय खुशी माहौल है। आज जयपुर मांय भारतीय जनता पार्टी रा प्रदेश कार्यालय मांय खुशियां मनायी ज्यी अर आतिशबाजी करी ज्यी। ईणी तरह श्री बिरला रा चुणाव हलका कोटा मांय ई लोगां पटाका चलाया अर एक-दूजां ने मिठाई खिला र खुशियां मनायी।

000

कांग्रेस सांसद राहुल गांधी लोकसभा मांय विपख रा नेता व्हेला। पार्टी महासचिव के.सी. वेणुगोपाल बतायो के पार्टी संसदीय दल री अध्यक्ष सोनिया गांधी प्रोटेम स्पीकर भर्तृहरि मेहताब ने कागद लिख ने आ जाणकारी दी है।

000

मुख्यमंत्री भजनलाल शर्मा काले झुंझुनूं ऊं सामाजिक सुरक्षा पेंशन योजना रे तैत बधी रकम रो पेंशनरां रा बैंक खातां मांय सीधा हस्तान्तरण करेला। ई दौरान लाभार्थी संवाद कार्यक्रम ई व्हेला। मुख्यमंत्री 88 लाख 44 हजार लाभार्थियां रा बैंक खातां मांय 1 हजार 38 करोड 55 लाख रूप्या री रकम ट्रांसफर करेला। वां रे साथे सामाजिक न्याय अर अधिकारिता मंत्री अर जिला रा प्रभारी मंत्री अविनाश गहलोत ई रहवेला। बाड़मेर मांय सामाजिक सुरक्षा पेंशन योजनावां रा लाभार्थियां रो जिला थर रो कार्यक्रम काले भगवान महावीर टाऊन हॉल मांय व्हेला। ई दौरान बाड़मेर जिला रा 1 लाख 95 हजार ऊं बत्ती पेंशनर रा खाता मांय 22 करोड 49 लाख रूप्यां डीबीटी री मार्फत भेजा जायेला।

000

आकाशवाणी समाचार जयपुर कानी ऊं प्रादेशिक समाचार बुलेटिनां मांय तीन नुवा आपराधिक कानूनां रा बारा मांय जाग जगावण रा मकसद ऊं कडी चलायी जाय री है आज जाणकारी देवा भारतीय नागरिक सुरक्षा संहिता री धारा 413 रा बारा मांय। पीड़ित मिनख ने धारा 413 रे तहत बरी करण या छोटा अपराध सारू दोषी ठहराया जावण या कमतर मुआवजो लगावण रा किणी आदेश रे खिलाफ अपील करण रो हक है। पीड़ित ने ई हक रो प्रयोग करण सारू राज्य री मंजूरी या अनुमोदन री जरूरत नी है। ओ प्रावधान पीड़ित ने अपील करण री स्वायत्तता दे र सुणवाई रा हक अर कानूनी कार्यवाही मांय सक्रिय रूप ऊं भाग लेवण रा हक ने मजबूत करे है।

आं कानूनां रा बारा मांय जाग जगावण सारू जिलां मांय ई न्यारा-न्यारा कार्यक्रम कर्या जावे। डूंगरपुर मांय आज ई सिलसिलां मांय संगोष्ठी राखी ज्यी। पुलिस अधीक्षक मोनिका सेन बतायो के संगोष्ठी री मार्फत न्यारा-न्यारा तबका ने नुवां कानूना रा बारा मांय बतायी ज्या।

000

प्रदेश रा केई जिला मांय हळकां ऊं तेज बिरखा व्ही है। चित्तौडगढ़ मांय दोपरां पछे व्ही तेज बिरखा ऊं सडक माथे पाणी भरीज ग्यो। उदयपुर मांय ई तेज बिरखा व्ही जिण ऊं लोगां ने गर्मी अर उमस ऊं आराम मिल्यो। करौली अर भरतपुर मांय ई जोरदार पाणी बरस्यो। राजधानी जयपुर रा केई हलकां मांय चोखी बिरखा व्ही। सिरोही रा केई कस्बां मांय आज मेह होवण ऊं लोगां ने उमस ऊं आराम मिल्यो है। बांसवाड़ा समेत केई दूजां जिलां मांय ई आज हल्की ऊं मझला दर्जा री बिरखा रा समचार है। पाली रा बीजापुर गांव मांय बिरखा रे दौरान छज्जो पड़ जावण ऊं दो टाबरां री मौत व्हे गयी अर तीन घायल व्हे ग्या। उठिने, चूरू मांय दिनभर उमस रे पछे सिंज्यां पाणी बरस्यो, जद के शाहपुरा अर श्रीगंगानगर मांय उमस अर गर्मी ऊं लोग परेशान रह्या। मौसम केन्द्र जयपुर रा निदेशक राधेश्याम शर्मा बतायो के मॉनसून आवता कुछ दिन मांय राज्य रा दूजां हलकां मांय सक्रिय व्हे जायेला। वणा कह्यो के आवण वाळा दिनां मांय बिरखा रे साथे बिजली पडण रा मामलां मांय बढवार व्हेला।

000

आज मादक पदार्था रे दुरुपयोग अर गैर कानूनी तस्करी रे खिलाफ अंतरराष्ट्रीय दिवस है। ओ दिन विश्व औषधि दिवस रा रूप मांय ई मनायो जावे है। ई साल रो मुद्दो है—साक्ष्य से स्पष्ट है—रोकथाम में निवेश आवश्यक।

नशा छोड़ण मांय मदद सारू सरकार एक हेल्पलाइन नंबर 1 4 4 4 6 ई सरू कर्यो है। ई हेल्पलाइन री मार्फत लोगां ने सलाह दी जावे। प्रदेश मांय ई मौके केई कार्यक्रम करी ज्या। राजधानी जयपुर रा आमेर हलकां मांय कुण्डा रा नशा मुक्ति केन्द्र ऊं रैली निकाली ज्यी। सिरोही जिला रा आबू रोड मांय नशीली दवाया रा दुरुपयोग अर गैर कानूनी तस्करी रे खिलाफ कार्यक्रम व्ह्यो। ई दौरान नशा मुक्ति री शपथ दिरायी जयी। अजमेर मांय नशा मुक्ति रैली निकाली ज्यी। करौली मांय ई मौके पुलिसकर्मियां ने नशा नी करण री शपथ दीरायी ज्यी। भरतपुर मांय जागरूकता रैली निकाली ज्यी। चूरू मांय सेमिनार व्ह्यो। पाली मांय संगोष्ठी अर शपथ रो कार्यक्रम व्ह्यो। जोधपुर मांय एनसीबी कानी ऊं नशीले पदार्था रा दुरुपयोग अर गैर कानूनी तस्करी रे खिलाफ वॉकथान व्ह्यो। जैसलमेर मांय बीएसएफ रा जवाना नशा मुक्ति री शपथ ली अर जागरूकता रैली निकाली।

000

नीट यू.जी. परीक्षा रा बारा मांय न्यारी-न्यारी प्रतियोगी परीक्षावां मांय साफगोई तैय करण सारू सरकार कानी ऊं उठायी ज्या कदमां री न्यारा-न्यारा शिक्षाविदां सराहना करी है। ईणी कडी मांय बरेली अन्तर्राष्ट्रीय विश्वविद्यालय रा कुलपति डॉ. केशव कुमार अग्रवाल कह्यो के देश रा पढेसरां रा भविष्य ने ध्यान मांय राखता सरकार चाइजता कदम उठावेला। वणा पढेसरां ऊं निश्चिन्त रहवण री अरज करी है।

000